

La storia “riveduda” te la fotografies de Pascalín

L projet de l'artist Claus Soraperra vegnarà metù fora tel Museo Ladin te la pruma setemèna de november

“Pascalín_Project” l'é n projet ideà da l'artist Claus Soraperra, sostegnù da l'Istitut Cultural, l Museo Ladin, l Comun de Cianacei e la Frazion de Gries. N projet nasciù per recordèr l fotograf da Gries 100 egn dò sia mort, ma ence per soscedèr l debatit sui temes emportanc de la tradizion e la globalisazion.


Claus Soraperra se à metù a confront co la fotografies de Pascalín, sun cheles che l'à fat na rielaborazion personèla e moderna. Travers na azion de descomposizion de chisc retrac, l projet vel analisèr i mudamenc che l'é vegnù dò cà te la sozietà fascèna, proan a entener “olache la é” e “olache la é dò che la va”. I retrac de Pascalín l'é l spieie de la sozietà del passà te si momenc più particulères, e trèss l'elaborazion artistica de Soraperra les doventa l leam con chela del prejent.

Chest projet se spartesc te più pèrts proprio percheche l se lea a momenc particulères de noscia jent. Na òpera dal titol “turism_ambient”, dedichèda ai 100 egn de la strèda de la Dolomites, é stata metuda fora te Museo Ladin en ocajion di festejamenc per l cedeand del stradon.

N auter tulin é stat prejentà la

setemèna passèda en ocajion de la Festa del Rengraziament de l'Union di Ladins de Fascia, e metù fora te tendon de la manifestazions de Poza. Se trata de n veie retrac fat anter la fin de l'Otcent e i prumes egn del Nefcent, tout fora dai archivies de la Frazion de Gries, che moscia n grop de Veteraner. N retrac rielaborà da Claus Soraperra, che tira l'atenzion proprio per i particulères che l'artist ge à jontà apede, e che i envia a fèr na reflescion fona sul segnificat de la vera e de la religion, sun sie leam e sia consequenzes. Na òpera che lascia l'usc avert al sentiment personèl de chi che ge vèrda e che vel soscedèr la coscienza critica sui temes emportanc de noscia sozietà.

Chest tulin, dal titol “vera_religion”, ensema a chel sun “turism_ambient” e etres 2 sun “tradizion_jogn” e “familia_persona” e un più picol (autoretrat de Pascalín dal titol Pascalín_Nadar) vegnarà metui fora te Museo Ladin ai 31 de otober che vegn e i resterà fora da poder veder per duta la pruma setemèna de november, da les 3 enschin les 7 domesdi o ence inant mesdi su apuntament per la scoles.



Tel tulin “vera_religion” l'artist Claus Soraperra à lurà fora n veie retrac de Franz Dantone Pascalín.